

Kod nas bi zbog izgradnje odlagališta nuklearnog otpada, bili ugroženi ljudski životi, ali i poljoprivredna proizvodnja, maline, kesten, pčelarstvo, rekao je Agan Bunić iz Bužima. Bosna i Hercegovina, od najnižih do najviših nivoa vlasti, čini sve da spriječi Republiku Hrvatsku u namjeri da izgradi odlagalište nuklearnog otpada u Trgovskoj gori, u općini Dvor, neposredno uz granicu sa našom zemljom.

U Federalnom ministarstvu okoliša i turizma su kazali da je u toku prikupljanje informacija za Parlament Bosne i Hercegovine radi zauzimanja konačnog stava po ovom pitanju. Agan Bunić, načelnik općine Bužim je rekao kako su oni iz Krajine, spremni i na radikalnije mjere, ali neće dozvoliti odlaganje nuklearnog otpada. Dodaje da su i općine u Hrvatskoj podigle svoj glas protiv nuklearnog odlagališta.

Bosna i Hercegovina se protivi namjeri Republike Hrvatske da odlaže nuklearni otpad na Trgovskoj gori. Parlament Federacije BiH je usvojio Deklaraciju u kojoj je jasno izraženo protivljenje namjerama RH da odlaže otpad na navedenoj lokaciji. U slučaju odlaganja nuklearnog otpada na navedenoj lokaciji, posredno i neposredno, bilo bi ugroženo više od 200.000 stanovnika tog područja, okolno tlo i vode, jer je predmetno područje po geološkim karakteristikama veoma nestabilno - rekli su u Federalnom ministarstvu okoliša i turizma. U Republici Hrvatskoj su u toku javne rasprave o utjecaju na okoliš odlagališta, i na sve ono što mi ističemo kao problem. I te javne rasprave prema informacijama kojima raspolažemo, ne idu im baš po planu. Konačno, i općine iz te zemlje su digle svoj glas i bore se protiv odlagališta. Mi smo jednoglasni po tom pitanju, ali treba dodatni pritisak. Koda nas bi zbog izgradnje odlagališta nuklearnog otpada, bili ugroženi ljudski životi, ali i poljoprivredna proizvodnja, maline, kesten, pčelarstvo - govori Agan Bunić, načelnik općine Bužim. Dodaje da projekat vezan za kesten rade sa Bosanskom Kostajnicom, Dvorom i Bosanskim Novim, što je po njemu dodatni razlog da se ne dozvoli gradnja odlagališta nuklearnog otpada.

Mi ćemo taj projekat kestena koji je specifičan samo za ovo naše podneblje u BiH i Hrvatskoj, aplicirati prema Evropskoj uniji i to je još jedan od razloga da se Evropska komisija oglasi, da izvrši pritisak na Republiku Hrvatsku, da promijeni odluku vezano za izgradnju odlagališta u Trgovskoj gori. Pokrenuta je inicijativa da Federalno ministarstvo poljoprivrede, koje radi trenutno Nacrt zakon o šumama, u zakonu posebno tretira šume kestena, da budu od posebnog značaja - govori Bunić.

Kaže kako su to sve inicijative koje idu u pravcu zaštite Krajine, onemogućavanja izgradnje odlagališta nuklearnog otpada.

Ponavljam, provode se javne rasprave, stručne analize i ništa ne ide u prilog odluci.

Pozitivna je stvar da su konačno i lokalne zajednice iz Republike Hrvatske, koje su bile pod

određenim političkim pritiskom, u posljednje vrijeme sve više protiv. Mi smo spremni i na radikalnije mjere, proteste, samo da se spriječi izgradnja. Naše područje zovu "zeleni kanton". Tu je rijeka Una, poljoprivredna proizvodnja - rekao je Bunić.

Pored općine Bužim, protiv odlaganja nuklearnog i radioaktivnog otpada u Trgovskoj gori su i stanovnici Bihaća, Velike Kladuše, Bužima, Bosanske Krupe, Krupe na Uni, Sanskog Mosta, Ključa, Ribnika, Bosanskog Petrovca, Bosanskog Novog, Bosanske Kostajnice, Bosanske Dubice i Prijedora.

izvor: aarhus.ba